

**03 OKTOBER 2013**

## **Sorok syabu dalam periuk**

Jakarta: Seorang rakyat tempatan yang bekerja di luar negara ditahan selepas dadah jenis syabu di temui bersama-samanya di Lapangan Terbang Soekarno Hatta di Tangerang baru-baru ini.

Suspek yang hanya dikenali sebagai SU ditahan penguatkuasa kastam lapangan terbang itu dan pegawai Agensi Dadah Nasional (BNN).

Ketua Unit Siasatan BNN, Sumirat Dwiyanto berkata, SU ditahan ketika menunggu penerbangan seterusnya ke Madura.

Menurutnya, SU mungkin menjadi mangsa sindiket dadah antarabangsa.

“Kastam yang bertugas curiga dengan barang yang dibawanya.

“Selepas diperiksa, mereka menemui 2.588 gram serbuk putih yang disembunyikan dalam bungkusan yang dimuatkan dalam beg berisi barangan bayi dan periuk nasi elektrik,” katanya pada sidang akhbar semalam.

Menurutnya, SU, ketika disoalsiasat berkata, barangan itu milik lelaki bernama MF yang meminta dia membawanya dari Malaysia ke Sampang, Madura.

“Berdasarkan siasatan, SU sudah tahu yang barang dibawanya itu dadah. Sebelum pulang, dia diberikan tiket pesawat percuma dan wang tunai Rp1 juta (RM284) oleh MF,” katanya.

Sumirat berkata, MF berjanji memberikan SU Rp30 juta (RM8,547) lagi jika dia berjaya membawa barang larangan itu ke Madura. - Tribunenews.com

***Artikel ini disiarkan pada : 2013/10/03***